

Մ Ա Տ Ե Ն Ա Խ Օ Ս Ա Կ Ա Ն

Ազգագրութիւնը հայագիտութեան կարևոր ճիւղերից մէկն է։ Հայ ժողովրդի հոգեբանութիւնը ուսումնասիրելու համար անհրաժեշտ է ուսումնասիրել միջավայրը՝ ուր նա ապրում է, սովորութիւնները՝ որոնցով իր կեանքի ընթացքն է առաջ վարում, անգիր բանահիւսութիւնը՝ որով իր հոգեկան պահանջներին բաւարարութիւն է տալիս։ Կեանքի պայմանների արագ փոփոխութիւնը, քաղաքի և շրջակայ ժողովուրդների անխուսափելի ազդեցութիւնը արագօրէն կերպարանափոխում են հայ ժողովրդի բնիկ կեանքը։ Կանցնի մի անբուժելի էլ, և այլևս շատ բան մեզ համար անդարձ կորած կը լինի։ Այս պատճառաւ ահա անհրաժեշտ է շտապեցնել ազգագրական ուսումնասիրութեան գործը։ Անհրաժեշտութիւնը դառնում է սոխպողական՝ մանաւանդ մանր գաղութների համար, այժմ, երբ հարց է ծագել հայութեան այդ մանր մունր բեկորները հաւաքելու և հայրենի հողի վրայ տեղաւորելու։

Ահա այս պատճառաւ մի անգնահատելի ծառայութիւն է մատուցանում հայագիտութեան՝ մեր երիտասարդ մտաւորականներից պր. Արամ Երեմեանը, որ իր վրայ է վերցրել Նոր—Ջուղայի շրջանի հայ ժողովրդի ազգագրութիւնը ուսումնասիրելու դժուարին գործը։ Նա արդէն հրատարակել էր մի հատոր՝ Նոր—Ջուղա վերնագրով (տպ. Նոր—Ջուղա 1919), որի մէջ տալիս է Նոր—Ջուղայի տեղագրութիւնը և նրա եկեղեցիների, գաղտնիների, ընկերութիւնների և այլ կրթական ու հասարակական հաստատութիւնների գործունէութեան պատմութիւնը՝ համառօտ կերպով։

Այժմ հեղինակը հրատարակում է իր երկրորդ գործը, որ կրում է «Ապահանի Փէրիա գաւառը» վերնագիրը և պարունակում է Նոր—Ջուղայի մերձակայ յիշեալ հայաշատ գաւառի ազգագրութիւնը, իբր յաւելուած կցելով նաև Քեարւանդ գաւառը։ Այս աշխատութեան մէջ մանրամասն նկարագրուած է Փէրիայի հայաբնակ 26 գիւղերի և Քեարւանդի 2 գիւղերի տեղագրութիւնը մի առ մի, բնակիչների շնչահամարը, նրանց տնտեսական դրութիւնը, այն ծանր հարստահարեալ վիճակը՝ որին ենթարկուած են գրեթէ անխտիր յիշեալ բոլոր գիւղերի հայերը՝ շրջաբնակ պարսիկ խաների ու աւազակաբարոյ լոռերի ձեռքին, նրանց նիստ ու կացը, սովորութիւնները,